

**Poli à letereŋi niŋcyiŋi ŋgemu  
tun Tesaloniki kàhe  
dánafeebil'á ke  
Mpe yii à yaa yii cè mà jwo yii jyè  
letereŋi funŋo jwumpe e ke**

Tesalonike kàhe na mpyi Masedoni kùluni i. Silasi ná Timoti à Poli tège Jwumpe Nintanmpe njwuŋi na wani, ka pìi si piye kan Yesu á. Poli nyè a já a tère nimbwoo pyi wani kuru kàhe na me, jaha kurugo ye Yahutuubil'à u kyéregè wani (Kapyiŋkii 17).

Poli yiriŋkwooni kàntugo lire kùluni i, u à Timoti tun Tesaloniki kàhe e, u sà dánafeebii kàanmucya kampyi yyefuge nyè a pi pyi pi à sàa le Kile kuni naaranji na me. Nyè tèni i Timoti à nùr'a pa maa jwuntanma jwo Poli á mà yyaha tíi ná dánafeebil'e ke, ka Poli funntanga wuŋi si nge letereŋi sém'a tun pi á.

Nge letereŋi funŋke e u à fwù kan Kile á, maa màban le dánafeebil'e, bà pi si mpyi si ŋkwôro Kile kuni i s'a sè yyaha na me.

U à pi funŋo cwo u báaraŋi pyiŋkanni na tèni i u mpyi pi shwòhòl'e ke. U funŋk'à táan, jaha kurugo ye u à li nya na dánafeebil'à kwôro Kile kuni i, ali mà li ta ngahaŋi nyè pi juŋ'i. U la nyè si nùru pi nya (1-3). U à pi funŋo cwo u kàlaŋi na mà yyaha tíi ná naaraŋkanni niŋcenni i. U à li cya pi á na pi a piye kàanmucaa katupwòhòyi na (4.1-12).

Dánafeebii kurunke e, pìi funmpen wuu pi mpyi mà yyaha tíi ná dánafeebii niŋkwuubil'e. Ka Poli si

màban le pi e maa li cyêe pi na na Yesu à jè a fwooro kwùñi i pyiñkanni ndemu na ke, dánafeebii pi à kwû ke, Kile sí pire jè Yesu fiige. U à jwo na Yesu sí núru n-pa canñka. U aha mpa, dánafeebii puni sí n-pyi ná u e fo tèekwombaa (4.16-17).

### *Jwumpe tasiige*

<sup>1</sup> Yii dánafeebii kurunke ku jye wuu Tunji Kile ná wuu Kafoonji Yesu Kirisita wuubii Tesaloniki kànhe e ke, mii Poli ná Siliven ná Timoti, wuu pi à nge letereñi séme si ñkan yii á. Kile u jwó yii na, u u yyeñiñke kan yii á.

### *Tesaloniki kànhe dánafeebii Kile kuni ñaarañkann'à Poli yyaha ñi*

<sup>2</sup> Wuu maha fwù kaan Kile á yii kyaa na tèrigii puni i. Wuu aha a si raa u jáare tère o tère e ke, wuu funñó jye na wwùu yii na me. <sup>3</sup> Kacennkii yii à pyi maa li cyêe na yii à dá Yesu Kirisita na ke, ná báarañi yii à pyi maa li cyêe na Kile kyal'à táan yii á ke, ná pyiñkanni na yii à yiye waha maa yii sònñore taha wuu Kafoonji Yesu Kirisita na ke, wuu aha a Kile jáare, wuu funñó jye na wwùu cyire na me. <sup>4</sup> Wuu cìmpyiibii, wuu à li cè na Kile à yii kyaa táan uy'á maa yii cwóñr'a pyi u wuu. <sup>5</sup> Yii li cè na tèni i wuu à Jwumpe Nintanmpe jwo yii á ke, li jye a mpyi a dá jwójwumpe kanni na me, ñka Kile Munaani fànhe mú mpyi a bâra maa yii pyi yii à dá na wuu jwumpe na jye sèe. Ñaarañkanni na wuu mpyi na ñaare yii shwòhòl'e yii ntègeñi kurugo ke, yii à lire cè. <sup>6</sup> Wuu ñaarañkanni ná Kafoonji wuuni jye niñkin, lire ñaarañkanni yii s'à lwó. Kile Munaani fành'à yii pyi yii à jèe Kile jwumpe na ná

funntange e yii yyefuge t̀erigil'e. <sup>7</sup> Lire pyinƙanni na, yii à pyi yyecyeenε Masedoni ná Akayi k̀ùligii d̀ánafeebii pun'á. <sup>8</sup> Yii à pyi kaɗuɗo mà Kafooji Jwumpe pyi p'á caala mà lwó yii yyére, mà sà nɔ fo Masedoni ná Akayi k̀ùligii na, mà bâra lire na, d̀ániyaɗi yii à pyi Kile na ke, uru kyal'à jwo cyeyi puni i. Lire kurugo wuu saha nyε na wuye k̀anre na yii kyaa yu s̀upya á mε. <sup>9</sup> T̀eni i wuu à shà yii yyére ke, pyinƙanni na yii à wuu ǹuɗo b̀ê, ná pyinƙanni na yii à k̀antugo wà yii yasuɗy'á ke, mà bâra lire na, Kileni nyii wuɗi u nyε Kileni s̀eè wuɗi ke, yii à nyε uru na maa u p̀êre, s̀upyire puni na yire yu. <sup>10</sup> Pi à li c̀è mú na yii na Kile Jyaɗi Yesu sigili. Kile à u nyè a yige kẁuɗi i, uru u sí n-ỳiri ǹiɗyini na mpa wuu shwɔ Kile l̀uyirini nimpani na.

## 2

### *Kile báaraɗi Poli à pyi Tesaloniki k̀anhe e ke*

<sup>1</sup> Wuu c̀inmpyiibii, yii yabilimpil'à li c̀è na wuu kasheeni nyε a pyi yii yyére ǹuɗo baa mε. <sup>2</sup> Yii à li c̀è na Filipi k̀anhe shiinbil'à wuu kyérege, maa wuu cyahala, nka lire ná li wuuni mú i, Kile barag'e, wuu à wuye waha maa nkaɗ'a sà Jwumpe Nintanmpe jwo yii á, ali mà li ta wuu z̀ampɛɛn bil'à nyaha.

<sup>3</sup> Jwumpe wuu à jwo s̀upyir'á maa pi le kuni niɗcenni i ke, wuu nyε a puru jwo pi á ná pi nɗurugo funɗ'i, lire nyε mε ná funɗkyaange e, lire nyε mε ná ǹaɗwɔhɔɗo funɗ'i mε. <sup>4</sup> Nka Jwumpe Nintanmpe Kile à kan wuu á ke, puru wuu nyε na yu. Naha kurugo yε u à wuu k̀aanmucya mà li nya na wuu sí n-jà uru báaraɗi pyi, lire e u à wuu pyi wuu u mpe Jwumpe Nintanmpe yu s̀upyir'á. Wuu nyε na pu

yu wuu kyaa si ntáan sùpyir'á mε, ηka wuu na pu yu wuu kyaa si ntáan Kile á. Uru u à wuu zòmpii cè.

<sup>5</sup> Yii yabilimpil'à li cè kàyituwəgəɾə bà wuu à jwo yii á mε, là nta kurugo bà wuu mú s'à pu jwo mε. Kile u ηyε wuu shèɛfooni. <sup>6</sup> Mεcyara kurugo bà wuu ηyε na puru Jwumpe Nintanmpe yu yii á, lire ηyε mε sùpyire sannt'á mε. <sup>7</sup> Mà li ta wuu mpyi na sí n-jà fànha cyán yii na, ηaha na yε Kirisita tūntunmii pi ηyε wuu. Nka lire ná li wuuni mú i, wuu à pyi nùmpinɛfee yii shwəhəl'e, bà pyàni nuŋi nùŋke maha mpi ná u e, maa yaha u na mε. <sup>8</sup> Nyε yii ntáannamagare t'à sù wuu e ke, tire t'à wuu pyi wuu à Jwumpe Nintanmpe jwo yii á, puru mpemu p'à fworó Kile e ke. Lire kanni bà mε, wuu mpyi a sàa li ta kacennε si yii tɛgε pyinɛkannigii puni na, ali li mée ká bê ná wuu múnahigil'e, ηaha na yε yii kyal'à waha wuu na sèl'e.

<sup>9</sup> Mii cìnmpyiibii, tēni i wuu à sà Kile jwumpe jwo wani yii yyére ke, kanhanɛkanni ná báarawage wuu à pyi pìlaga bàra canɛa na, bà li si mpyi wuu àha bú ηkwò mpyi tuguro yii nuŋ'i mε, yii funɛə ηyε a wwò lire na mà kε!

<sup>10</sup> Yii à li ηya, Kile mú à li ηya, ηaraanɛkanni na wuu mpyi na ηaare yii shwəhəl'e ke, lire mpyi a ηwə maa ntíi, wuu mú mpyi tìgire cyaga baa.

<sup>11</sup> Yii mú à li cè na bà tufooni maha u pyìibii cū mε, amuni wuu à yii puni niŋkin niŋkinɛi cū. <sup>12</sup> Wuu mpyi maha yii yεɛge maa màban leni yii e, maa yi yu na wahage yii á, na yii yii ηaraanɛkanni yaha li yyaha tí ná Kile ηyii wuuni i, uru ηgemu u à yii yyere, bà yii si mpyi si jyè u Saanre sìnampe e mε.

13 Lire kurugo wuu fwù nyε Kile na t̀erigii puni i, naha na yε Jwumpe Nintanmpe wuu à jwo yii á ke, yii nyε a pu pyi s̀upyire jwumɔ mε. Nka bà pu nyε mε, yii à pu c̀u amuni, maa li c̀e na Kile jwumpe pu nyε pu pi, yii pi à dá Yesu na ke, na puru pu nyε na yii s̀on̄ɔre k̀eɛn̄ɛi. 14 Wuu c̀inmpyiibii, Kile à mpiimu yyere ka pi i dá Yesu Kirisita na Zhude k̀uluni i ke, yii ná pire mú à pyi nin̄kin, naha na yε bà Yahutuubii pil'à pire kyérege mε, amuni yii yabilimp̄ii s̀upyiibil'à yii kyérege. 15 Pire Yahutuubil'à Kile m̀ump̄enmε pyi maa Kafoon̄i Yesu ná Kile t̀unntunmp̄ii b̀o, maa wuu kyérege. Pi à piye pyi s̀upyire puni z̀amp̄enm̄ii. 16 Jwumpe wuu nyε na yu supyish̄in̄i san̄'á, bà pi si mpyi si shwɔ mε, pi la nyε si wuu sige puru njwun̄i na. Lire mpyin̄i cye kurugo, pi à là bâra pi kapegigii na, fo Kile l̀un'á pa ȳiri pi taan maa bégele pi nt̀un̄n̄i mεε na.

*Tesaloniki k̀an̄he dánafeebii lage nyε Poli na*

17 C̀inmpyiibii, wuu pi ke, wuu à ȳiri yii taan si t̀ere pyi, wuu nyε na yii naa mε. Nka wuu na s̀on̄n̄i yii kyaa na. Mà pu f̄in̄in̄'a jwo, wuu la nyε si yii n̄ya sahan̄ki. 18 Lire kurugo wuu la nyε si s̀à fwooro yii na. Mii Poli yabilin̄'á lire k̀usheeni kyal'à yaha tooyo nin̄yahay'e, nka Sitaann̄in̄i à wuu pyi wuu nyε a já a lire k̀uluni t̀ooge lwɔ mε.

19 Nyε jofoo u nyε wuu s̀on̄ɔre tatahage yε? Jofoo u nyε wuu funntange ǹun̄ke yε? Jofoo u nyε wuu p̀eente ǹun̄ke yε? Yii pi. Wuu Kafoon̄i Yesu cannuruge, yii pi sí n-pyi wuu s̀on̄ɔre tatahage, si mpyi wuu funntange ǹun̄ke, si mpyi wuu p̀eente ǹun̄ke Yesu yyahe taan. 20 S̀eɛn̄i na, yii pi nyε wuu p̀eente ná wuu funntange ǹun̄ke.

### 3

#### *Poli à Timōti tun Tesaloniki kànhe dánafeebil'á*

<sup>1</sup> Nye wuu à mō a yii kyaa lógo fo li nye a pa jwō me, ka wuu u li lwó wuye funḡ'i, maa ntèen naha Atēni kànhe e, <sup>2</sup> maa wuu cìmpworonaji Timōti tun yii á, bà u si mpyi si yii tège yii a si yyaha na Kile kuni i, si maban le yii e me. Kile báarapyjεε u nye u wi Jwumpe Nintanmpe njwuḡi kurugo, puru mpemu pu nye na Kirisita kyaa yu ke. <sup>3</sup> Wuu à lire pyi bà li si mpyi yyefuge ku nye yii juḡ'i ke, kuru kà ḡkwò maban fō yii e me. Yii yabilimpil'à li cè na kuru yyefuge yahare e wuu nye. <sup>4</sup> Mà wuu yaha wani yii yyére, wuu mpyi maha yi yu yii á na yyefugo karií sí n-pa wuu dánafeebii ta. Nye bà yii nye na li naa me, kuru yyefuge e yii nye numε. <sup>5</sup> Lire kurugo l'à pa tayyérege fō mii na, ka mii i Timōti tun yii yyére u u sà yii Kile kuni jaaraḡkanni kàanmucya u pa jwo na á, naha na ye mii mpyi na fyáge Sitaanniḡi kà ḡkwò yii sòn n-yige Kile kuni i, si wuu báaraḡi pyi juḡo baa me.

<sup>6</sup> Nka Timōti à nūr'a pa a yīri yii yyére ke, jwumpe u à jwo wuu á mà yyaha tí ná yii Kile kuni jaaraḡkanni ná yii ntàannamagare e ke, pur'à wuu funḡyi jíḡε. U à jwo wuu á mú na yii funḡo wà à wwò wuu na me, na bà wuu la nye si yii nya me, amuni yii la mú nye si wuu nya. <sup>7</sup> Lire kurugo wuu cìmpyiibii, wuu à yire lógo ke, ali mà li ta wuu nye yyefuge ná nàvunḡke e, yii Kile kuni jaaraḡkann'à wuu funḡyi pyi y'à jíḡε. <sup>8</sup> Numε, wuu yákilibil'à tèen, naha na ye yii à kwôro Kafoonḡi wwōjεεge e. <sup>9</sup> Yii kan'à wuu funḡyi táan pyiḡkanni ndemu na ke, wuu bá naha à cè pyiḡkanni na wuu sí Kile shéere

n-jwo με. <sup>10</sup>Wuu na Kile jáare sèe sèl'e pìlaga bâra canja na, bà u si mpyi si wuu yaha wuu núr'a sà fworó yii na με, lire cye kurugo cyeyi yi nyε yii sâha ηkwò a yire cè Kile kuni i με, bà wuu si mpyi si yii taanna yire na με.

<sup>11</sup>Lire kùluni tōoge wuu sí n-lwó si ηkàre yii yyére ke, wuu Tunji Kile ná wuu Kafoonji Yesu u kuni pwó wuu á. <sup>12</sup>Ntāannamagare ti nyε yii ná yiye shwòhòl'e ná yii ná sùpyire sannte shwòhòl'e ke, Kafoonji u là bâra tire na sèl'e, bà u a là bâra wuu woore na mà yyaha tí ná yii e με. <sup>13</sup>Lire ká mpyi, yii sí fànha ta, si ηkwôro tufeempe e si mpyi tìgire cyaga baa wuu Tunji Kile yyahe taan, Kafoonji Yesu cannuruge e ná u wuubii puni i.

## 4

### *Naaranjanni l'à táan Kile á ke*

<sup>1</sup>Nyε cìnmpyiibii, naaranjanni na yii à yaa yii a jaare, bà yii kyaa si mpyi si ntáan Kile á με, wuu à lire cyêe yii na. Yii mú bá sí na jaare amuni mà kwò. Nde wuu à sîi na jcaa yii á Kafoonji Yesu mege na numε sahanjki ke, lire li nyε, yii là bâra lire naaranjanni na. <sup>2</sup>Yεεyi Kafoonji Yesu à kan wuu á, ka wuu u yire jwo yii á ke, yii à yire cè.

<sup>3</sup>Nde l'à táan Kile á ke, lire li nyε: yii pyi fyìnme sùpyii, yii i jcwòre mpyiñi na. <sup>4</sup>Yii shin maha shin u pyi sèeshin u jà uye na, u raa njire kariii pyi. <sup>5</sup>Mpii pi nyε pi nyε Kile kuni i ná yii e με, yii àha jcwòre mpyiñi lage yaha ku yii ta pire fiige με. <sup>6</sup>Cikwuñi kàmpañke na, yii wà nyε a yaa u u cìnmpworonji wà mùmpenme pyi si u nàjwòhòrò με, jaha na ye bà wuu à têt'a yi jwo a waha yii á με,

Kafoonji sí cyire karigii shiŋi pyifeebii tùn. <sup>7</sup> Yii li cè na Kile nyε a wuu yyere katupwòhoyi mpyiŋi mεε na mε, fo fyiŋmpe karigii. <sup>8</sup> Lire kurugo ŋgemu ká ŋcyé ŋje yeεyi na ke, sùpya ŋwájwumò bà urufol'à cyé mε. Kileni u à u Munaani le wuu e, ná lire li ŋye Munaani niŋcenni ke, uru na urufol'à cyé.

<sup>9</sup> Ndemu li ŋye yii ná yiye shwòhòŋi ntàannamagare kani ke, ñùŋò ŋye mà yaaga sé'm'a kan yii á kuru kàmpañke na sahaŋki mε, ñaha na ye Kile yabilin'à lire kuni le yii taan mà kwò. <sup>10</sup> Lire kuni i yii mú ŋye na ñaare, mà yyaha tíi ná Masedoni kùluni dánafeebii puni i. Nka lire ná li wuuni mú i, mii cìmpyiibii, wuu na li caa yii á, yii là bàra tire ntàannamagare na sahaŋki. <sup>11</sup> Mà bàra lire na, mbèŋi u pyi yii ná sùpyire sannte shwòhòl'e. Sùpyire sannte karigii kàmpañke na, yii yiye pyiŋkanni cè, yii raa báaraŋi pyi bà yii si mpyi si yyere ná yii ñùŋò karigil'e mε. Wuu à fyànha a yire jwo yii á. <sup>12</sup> Lire ká mpyi, mpii pi ŋye pi ŋye Kile kuni i ná yii e mε, yii ñaaraŋkanni sí pire yyaha ñí, li mú saha sì ñò sùpya u yii tugure lwó mε.

### *Kwùubii ñèŋi kani*

<sup>13</sup> Wuu cìmpyiibii, mpii pi à kwû ke, wuu la ŋye yii i mpyi numpini ná yyetanhare e pire kàmpañke na sùpyire sannte fiige mε, pire mpiimu pi ŋye sòŋŋò tatahaga baa ke. <sup>14</sup> Ná wuu à dá li na na Yesu à kwû maa ñè, wuu mú à dá li na na dánafeebii pi à kwû ke, na Kile sí pire ñè n-yige kwùŋi i Yesu cye kurugo pi i mpyi ná Yesu i. <sup>15</sup> Mà tàanna ná Kafoonji Yesu jwumpe e, wuu sí mpemu jwo yii á ke, puru pu ŋye mpe: Kafoonji



cannuruge, nyii wuubii sì n-sii n-yaha kwùubii yyaha na mε. <sup>16</sup> Kuru canŋke, Kafoonji Yesu ká kuni kan, Kile m̄l̄εk̄εεbii ñùŋufoonji m̄ejwuuni sí n-lógo, lire ñw̄h̄o na Kile t̄inmpini sí n-wyì. Lire ká wyì, Kafoonji Yesu yabilinji sí n-yîri ñiŋyiŋi na si mpa. Mpii pi à kwû mà pi yaha Yesu Kirisita wwoŋεεge e ke, pire pi sí n-fyânha ñè. <sup>17</sup> Nyε lire ká mpyi a dánafeebii mpiimu ta nyii na ke, pire sí n-bâra pire na, si ŋkò n-yîri siŋcyan, si ŋkàre ñahanyi i, si zà Kafoonji ñùŋo b̄ê ñiŋyiŋi na. Lire pyiŋkanni na, wuu sí n-pyi ná Kafoonji i t̄erigii puni i. <sup>18</sup> Lire e ke yii a yiye f̄oŋŋi ná puru jwumpe e.

## 5

*Dánafeebil'à yaa pi bégel'a Kafoonji Yesu cannuruge sige*

<sup>1</sup> Mii c̄inmpyiibii, nde li nyε Kafoonji Yesu t̄enuruni, lire nyε mε u cannuruge kani ke, ñùŋo nyε mà yaaga sém'a kan yii á kuru k̄ampanŋke na mε. <sup>2</sup> Yii yabilimpil'à li cè a kwò na canŋke Kafoonji sí núru n-pa ke, kuru canŋke sí n-pâa sùpyire e, bà ñàŋkaanji maha mpâa yaage fol'e numpilage e mε. <sup>3</sup> T̄èni i sùpyire sí n-pa raa ŋko: «Wuu nyε yyeŋiŋke e, wuu saŋcw̄oŋŋ'á k̄òr'a ñw̄o» ke, nyε lire t̄èni i yyefugo nimbw̄h̄o sí n-pâa n-cwo pi na, bà layanŋke maha mpâl'a cwo ceenji laa wuŋi na mε. Pi wà tuffige sì n-shw̄o mε. <sup>4</sup> Nka mii c̄inmpyiibii, yii pi ke, kuru canŋke sì n-jà n-pâa yii e, bà ñàŋkaanji maha mpâa yaage fol'e mε, ñaha na yε yii nyε numpini i mε. <sup>5</sup> Yii puni na ñaare b̄èenmpe na canŋke e, wuu nyε mu à jwo sùpyire ti maha ñaare numpilage e numpini i mε. <sup>6</sup> Lire e ke wuu àha

raa ñwúuni bà sùpyire sannte maha li pyi mε. Nka wuu kwôro nyii na, wuu u wuye pèεge cè. <sup>7</sup> Yii li cè na numpilage e sùpyire maha ñwúuni, mpii pi maha sinmpe byii na ñcwu ke, numpilage e pire maha byii. <sup>8</sup> Nka wuu pi ñye na ñaare bènmpε e ke, wuu wuye pèεge cè. Dániyanji wuu à pyi Yesu Kirisita na ke, wuu raa sì yyaha na ur'e, wuu u wuu shinñεebii kyaa táan wuy'á. Wuu aha a lire pyi, li sí n-pyi mu à jwo tǝnnǝ vǝanntinñε wuu à le wuye na kǝshige yyaha na. Cannke Kile sí wuu shwǝ ke, wuu wuu sǝnnǝre taha lire na. Lire ká mpyi, li sí n-pyi mu à jwo tǝnnǝ ñuntǝñǝ wuu à tò.

<sup>9</sup> Yii li cè na Kile à wuu yyere ndemu mεε na ke, lire bà li ñye si tǝgire cyán wuu na mε. Nka u à wuu yyere bà wuu si mpyi si shwǝ wuu Kafoonji Yesu Kirisita cye kurugo mε. <sup>10</sup> Yesu à kwû wuu kurugo, bà li si mpyi u cannurug'à wuu ta nyii na yo, k'à wuu ta wuu à kwû yo, wuu u mpyi ná u e shì na mε. <sup>11</sup> Lire e ke bà yii à tēe na li pyi mε, yii a màban leni yiye e, yii raa fànha leni yiye e.

### *Yεεyi nizanñyi*

<sup>12</sup> Wuu na li ñáare yii á wuu cǝnmpyiibii, mpii pi ñye na báare sèl'e Kile á yii shwǝhǝl'e, maa yii yεεge, maa yii yyaha cú mà tàanna ná Kafoonji nyii wuuni i ke, yii pire pyi yii silegeshiin, <sup>13</sup> yii pèenε le pi e sèl'e yii i pi kyaa táan yiy'á pi báaranji kurugo. Yii yyenñke yaha ku pyi yii ná yiye shwǝhǝl'e.

<sup>14</sup> Wuu na li ñáare yii á wuu cǝnmpyiibii, yii i jwo ná sàafeebil'e, bà pi si mpyi s'a báare mε. Mpii pi ñye na fyáge ke, yii pire zǝmpyaagii waha. Mpii pi ñye pi ñye a shà yyaha na sèl'e Kile kuni i mε, yii pire tǝεε. Yii yii lùgigii táan ná sùpyire puni i. <sup>15</sup> Yii a yiye

kàanmucaa, yii wà nyε a yaa u kapii tég'a kapii fwoo tò με. Yii a kacεn̄kii pyi yii ná yiye shwǎhǎl'e, ná yii ná sùpyire sannte shwǎhǎl'e mú tèrigii puni i.

<sup>16</sup> Yii pyi funntange e tèrigii puni i. <sup>17</sup> Yii a Kile jáare tèrigii puni i. <sup>18</sup> L'à pyi ntàan yo, l'à pyi mpεn yo, yii a fwù kaan Kile á cyire karigii puni i. Lire li nyε Kile nyii wuuni mà yyaha tíi ná yii e, Yesu Kirisita wwojεεge e.

<sup>19</sup> Yii àha Kile Munaani nage fùgo yiye shwǎhǎl'e με. <sup>20</sup> Mpii pi nyε na Kile túnnture yu yii á ke, yii àha raa tíre túnnture jwumpe cyíge με. <sup>21</sup> Nka yii a pu puni kàanmucaa. Mpe p'à jwǎ ke, yii i puru cù. <sup>22</sup> Jwumǎ maha jwumǎ pu sí n-jà sùpya wà kapii na ke, yii àha jεε puru pà tufiige na με.

*Poli à jwó le Tesaloniki kànhe dánafebil'á*

<sup>23</sup> Kilenji u nyε na yyen̄jke kaan ke, uru u yii tège, bà yii si mpyi si mpyi sèeshiin karigii puni i με. U u yii múnahigii ná yii zòompíi ná yii cyeere màra, bà yii si mpyi si njkwôro tìgire cyaga baa fo si zà nǎ wuu Kafoonji Yesu Kirisita cannuruge na με. <sup>24</sup> Kilenji u à yii yyere ke, u sí lire pyi, jaha na ye jwǎmεε nin̄kinfoo u nyε u wi.

<sup>25</sup> Cìnmpyiibii, yii a Kile jáare wuu á mú.

<sup>26</sup> Yii cìnmpyiibii puni shéere cìnmpworogo fwù na ná fun̄cεn̄ji i.

<sup>27</sup> Mii na li jáare yii á Kafoonji mege na, yii i n̄ge letεren̄ji kála cìnmpyiibii pun'á.

<sup>28</sup> Wuu Kafoonji Yesu Kirisita u jwǎ yii na, u u yii tège.

**KILE JWUMPE SEMEŋI JWUMPE NINTANMPE**  
**New Testament in Senoufo, Supyire Farakala; spp**

copyright © 2008 Wycliffe Bible Translators, Inc.

Language: Supyire Sénoufo (Sénoufo, Supyire)

Translation by: Wycliffe Bible Translators

Contributor: Wycliffe Bible Translators, Inc.

**Copyright Information**

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Senoufo, Supyire

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-03-17

---

PDF generated using Haiola and XeLaTeX on 11 Nov 2022 from source files  
dated 29 Jan 2022

9c94658e-b59d-5cd7-bd2e-4e0770667d41